

**Govor rektorice Prof. dr. Nermine Hadžigrahić na svečanosti dodjele
doktorata 29.06.2018.**

Poštovani premijeru Suljkanović, uvaženi Ministri u Vladi TK,

Uvažene kolegice i kolege, doktori nauka, Dragi gosti i prijatelji,

Današnja svečanost promocije doktora nauka najbolji je način da obilježimo individualni uspjeh svakoga od vas, ali i naš kolektivni uspjeh - **42. godine rada**, istraživanja i stvaranja novih kadrova.

Naš Univerzitet danas ima **12 fakulteta i Akademiju dramskih umjetnosti**, na kojima studira bilzu **10 000 studenata**.

Nastava se odvija na preko **40 studijskih programa prvog, 40 programa drugog ciklusa studija i 15 programa trećeg ciklusa studija**. Na Univerzitetu u Tuzli do sada je diplomiralo preko 40 hiljada studenata, odbranjeno je više od 2700 magistarskih radova.

Tokom proteklih godina promovirali smo blizu **800 doktora nauka** iz različitih znanosti, na tom putu ostajemo i dalje, pored postojećih pokrećemo i **nove studijske programe 3. ciklusa** tako da ćemo od naredne akademske godine pružiti mogućnost studiranja na doktorskom studiju i na RGGF, na šta smo zaista ponosni.

Univerzitet u Tuzli ima tradicija koja nas obavezuje.

Još više nas obavezuje naša društvena odgovornost, jer obrazovanje je temelj razvoja jednog društva.

Okolnosti u kojima djelujemo obilježene su brojnim poteškoćama i to su izazovi naše stvarnosti.

Od univerziteta se očekuje, ne samo da obrazuje, već i da istražuje, traži rješenja, predlaže, ide naprijed.

Univerzitet nije samo učionica, nije samo laboratorij. Univerzitet je mjesto susretanja, kritičkog promišljanja, slobode, integralnih ličnosti...

Univerzitet je tribina, javni komunikacijski prostor, prostor sučeljavanja argumenata, debate i dijaloga.

U toj kristalizaciji mišljenja kriju se zapravo rješenja.

Obaveza univerziteta i akademske zajednice je traganje za najboljim rješenjima za dobrobit zajednice.

Ali, ne samo unutar akademske zajednice, već u saradnji sa donositeljima odluka, vladom, privrednicima, institucijama, ustanovama, agencijama, nevladinim organizacijama, medijima i građanima.

To se ne događa samo danas, samo u ovom, ili nekom slijedećem trenutku. To je dugotrajan proces u kome se svi izgrađujemo, postajemo bolji, kako bismo mogli tražiti najbolja rješenja.

Danas smo ovdje da svako od nas potvrdi na svoj način spremnost u procesu traženja rješenja za društveni napredak. Svako na svoj način.

Naši doktori nauka, koji će danas zasluženo dobiti diplome, sudjelovat će u procesu stvaranja novih vrijednosti. Neki od njih su već u procesu obrazovanja na našem, ili drugim univerzitetima.

Univerzitet u Tuzli je vaša kuća u koju ste uvijek doborodošl sa vašim idejama, projektima, ali i konstruktivnim kritikama.

U ovoj kući često gostuju naši ljudi koji su se ostvarili u inostranstvu, napravili zavidne karijere. Ovdje drže predavanja ili radionice o novim znanjima, tehnologijama ili projektima.

I oni i mi smo svjesni da je problema mnogo, ali su i šanse velike.

Neka ova današnja svečanost skrene vašu pažnju ka šansama, ka mogućnostima svakoga od vas, ali i nas kao društvene zajednice.

Neka vaš dalji rad bude usmjeren ka novom, naprednom, dobrom i korisnom.

Želim vam puno uspjeha u vašem profesionalnom radu, dobro zdravlje i svaku sreću.

Tuzla, 29.06.2018.